

四庫全書

子部

欽定四庫全書

冊府元龜卷八百三十九 宋 王欽若等撰

總錄部

文章第三

梁謝朓莊第二子初仕齊為吳興太守世祖嘗問王儉
當今誰能為五言詩儉對曰謝朓得父膏腴

江淹有所著文章並行於世位至金紫光祿大夫
謝淪朓弟也為侍中世祖起禪靈寺勅淪撰碑文

柳惔好學雅善製文初預齊武烽火樓宴帝善其詩謂
豫章王嶷曰惔非徒風韻清爽亦屬文道嚴惔著仁政
傳及諸詩賦粗有辭義位至尚書左僕射

沈約博通墳集能屬文謝元暉善為詩任彥昇工於筆
約兼而有之然不能過也立宅東田矚望郊阜嘗為郊
居賦以見意著文章志三十卷文集一百卷以為在昔
詞人累千載而不悟而獨得胸襟窮其妙趣自詣入神
之作高祖雅不好焉位至左光祿大夫侍中

任昉雅善屬文尤長於筆才思無窮當世王公表奏莫不請焉昉起草即成不加點竄沈約一代詞宗深所推揖梁臺建禪讓文誥多昉所具也所著文章三十三卷數十萬言盛行於世位至寧朔將軍新安太守

范雲善屬文位至尚書右僕射有集三十卷

庾肩吾八歲能賦詩時為兄於陵所友愛文集行於世位至度支尚書

周興嗣高祖革命興嗣奏休平賦其文甚美高祖嘉之

為散騎侍郎集直文德壽光省是時高祖以三橋舊宅
為光澤寺勅興嗣與陸倕各製寺碑及成俱奏高祖用
興嗣所製者自是銅表銘柵塘碣北伐檄次韻王羲之
書千字並使興嗣為文每奏高祖輒稱善加賜金帛
吳均字叔庠吳興故鄣人也家世寒賤至均好學有俊
才沈約嘗見均文頗賞嘆之均文體清拔有古氣好事
者或效之謂為吳體建安王偉鎮揚州引為記室
袁峻天監初為都陽王參軍高祖雅好辭賦時獻文於

南闕者相望其藻麗可觀或見賞擢峻乃擬揚雄官箴
奏之高祖嘉焉賜束帛除員外散騎侍郎直文德學士
省又奉勅與陸倕各製新闕銘

高爽於齊永明中贈衛軍王儉詩為儉所賞及領丹陽
尹舉爽郡孝廉天監初為晉陽令坐事繫治作鑊魚賦
以自況其文甚工後遇赦獲免頃之卒先是濟陽江洪
會稽虞騫與爽並工屬文洪為建陽令坐事死騫官至
王國侍郎並有文集

柳惲天監初為相國長史兼侍中以貴公子早有令名少工篇什始為詩曰亭皋木葉下隴首秋雲飛瑯琊王元長見而嗟賞因書齋壁高祖曲宴必被詔賦詩嘗奉和高祖登景陽樓中篇云太液滄波起長楊宮樹秋翠華承漢遠雕輦逐風游深為高祖所美

陸倕少勤學善屬文文集二十卷行於世官至太常卿到洽天監中為國子博士奉勅撰太學碑

張纘為湘州刺史述職經途乃作南征賦四千餘言著

鴻寶一百卷文集二十卷

傅映泛涉記傳有文才以篇什自命少時與劉繪蕭琛友善繪之為南康相映時為府丞文教多令具草

王筠為殿中郎為文能壓彊韻每公宴並作詞必妍美尚書令沈約深所推獎嘗啓高祖曰晚來名家唯見王筠獨步約於郊居宅造閣齋筠為草木十詠書之於壁皆直寫文詞不加篇題約謂人云此詩指物呈形無假題署約製郊居賦構思積時猶未都畢乃要筠示其草

筠讀至雌霓

五激切

連蹌約撫掌欣忭曰僕嘗恐人呼為

霓

五難切

次至墜石碰星及水懸埒而帶坻筠皆擊節稱

贊約曰知音者希真賞殆絕可以相要正在此數句耳

筠又嘗為詩呈約即報書云覽所示詩實為麗則聲和

被紙光影盈字夔牙接響顧有餘慙孔翠羣翔豈不多

愧古情拙目每佇新奇爛然總至權輿已盡會昌昭發

蘭揮玉振克諧之義寧止笙簧思力所談一至於此嘆

服吟研周流忘念昔時幼壯頗愛斯文含咀之間倏焉

疲暮不及後進誠非一人擅美推能實歸吾子遲比閑日清覲乃申為中書郎奏勅製開善寺寶誌大師碑文辭甚麗逸又勅撰中書表奏三十卷及所上賦頌都為一集昭明太子薨勅為哀策文復見嗟賞筠終光祿大夫司徒左長史筠自撰其文章以一官為一集自洗馬中書中庶吏部佐臨海太府各十卷尚書三十卷凡一百卷

鮑行卿以博學大才稱位後軍臨川王錄事兼中書舍

人遷步兵校尉上玉璧銘武帝發詔褒之嘗好韻語及拜步兵校尉面謝帝曰作舍人不免貧得五校實大尉例皆如此有集二十卷撰皇室儀十三卷乘輿龍興記

三卷

王僧孺少篤志精力於書無所不覩其文麗逸多用新事人所未見者世重其富為御史中丞高祖製春景明志詩五百字勅在朝之人沈約以下同作高祖以僧孺詩為最遷少府卿

張率少好屬文而七畧及藝文志所載詩賦今亡其文者並補作之所著文衡十五卷文集三十卷有虞訥者見而詆之率乃一旦焚毀更為詩示焉託云沈約訥便句句嗟稱無字不善率曰此吾作也訥慙而退率為司徒掾直文德省作待詔賦奏之甚見稱賞高祖手勅答曰省賦殊佳相如工而不敏枚舉速而不工卿可謂兼二子於金馬矣又侍宴賦詩高祖乃別賜率詩曰東南有才子故能服官政余雖慙古昔得人今為盛率奉勅

往返數首

謝覽天監初為中書侍郎掌吏部事頃之即真覽為人
美風神善辭令高祖深器之嘗侍座受勅與侍中王暕
為詩答贈其文甚工高祖善之仍使重作復合旨乃賜
詩云雙文既後進二少實名家豈伊爾棟隆信乃俱國
華

江革舉秀才累遷度支尚書有文集二十卷行於世子
行敏好學有才俊官至通直郎早卒有集五卷子從簡

少有文情年十七作採荷調以刺何敬容為當時所賞
官至司徒從事郎中

劉孝綽為秘書監辭藻為後進所宗世重其文每作一
篇朝成暮遍好事者咸誦傳寫流聞絕域文集數十萬
言行於世孝威孝儀皆其弟孝威為太子中舍人庶子
率更令掌館記大通九年白雀集東宮孝威上頌其辭
甚美孝儀幼孤與兄弟相勵勤學並工屬文兄孝綽嘗
曰三筆六詩三即孝儀六即孝威孝儀為尚書殿中郎

勅令製雍州平等金像碑文甚宏麗有文集二十卷行於世

王規為太子洗馬天監十二年改構太極殿功畢規獻新殿賦其辭甚工

蕭介少穎悟有器識博涉經史兼善屬文位至都官尚書

蕭洽字宏稱幼敏悟及長好學博涉亦善屬文高祖令製同泰大愛敬二寺刹下銘其文甚美又勅撰當塗堰

碑辭亦贍麗集二十卷行於世官至司徒左長史

康幾字德玄齊曲江公遙欣之子湘州刺史楊公則是
曲江之故吏也每見幾謂人曰康公此子謂桓靈寶復

出

靈寶桓
玄小字

及公則卒幾為之誄時年十五沈約見而奇

之謂其舅蔡樽曰昨見賢甥楊平南誄文不減希逸之
作始驗康公積善之慶終新安太守

江子一為中書侍郎卒有文筆數十篇行於世

何遜弱冠州舉秀才南鄉范雲見其對策大相稱賞因

結忘年交好自是一文一詠雲輒嗟賞謂所親曰頃觀
文人質則過儒麗則傷俗其能含清濁中今古見之何生
矣沈約亦愛其文嘗謂遜曰吾每讀卿詩一日三復猶
不能已其為名流所稱如此後為仁威廬陵王記室復
隨江州未幾卒東海王僧孺集其文為八卷初遜文章
與劉孝綽並見稱於世世謂之何劉世祖著論論之云
詩多而能者沈約少而能者謝朓時有會稽虞騫工為
五言詩名與遜相埒官至王國侍郎其後又有會稽孔

翁歸濟陽江避並為南平王大司馬府記室翁歸亦工
為詩避博學有思理二人並有文集

褚修善尺牘頗解文章初為湘東王國侍郎

謝蘭累遷外兵記室參軍時甘露降士林館蘭獻頌高
祖嘉之因有詔使製北兗州刺史蕭楷德政碑又奉令
製宣成王奉述中庸頌所製詩賦碑頌凡數十篇

謝幾卿好學博涉有文彩起家豫章王國常侍

陸雲公好學有才思先製太伯廟碑吳興太守張纘罷

郡經途讀其文歎曰今之蔡伯喈也續至都掌選言之於高祖召兼尚書儀曹郎

王籍好學博涉有骨氣樂安任昉見而奇之嘗於沈約坐賦得詠燭甚為約賞後為湘東王諮議參軍隨府會稽郡境有雲門天柱山籍嘗遊之或累月不反至若耶溪賦詩有云蟬噪林逾靜鳥鳴山更幽當時以為文外獨絕為詩慕謝靈運至其合也殆無愧色時人咸謂康樂之有王籍如仲尼之有丘明老聃之有嚴周

何思澄為安成王參軍兼記室隨府江州游廬山詩沈約見之大相稱賞自以為弗逮遊郊居宅新構閣齋因命工書人題此詩於壁傅昭嘗請思澄製釋奠辭辭文典麗思澄子助嘗為敗家賦擬莊周馬捶其文甚工世人記曰人中奘奘何子朗終國山令

劉杳工屬文沈約郊居宅新構閣齋杳為贊二首并以所撰文章示約即命工書人題其贊於壁仍報杳書曰平生愛惜不在人中林壑之懼多與事奪日暮塗殫此

心往矣猶復少存閒遠微懷清曠拓宇東郊匪云止息
正復頗寄夙心時得休偃仲長游居之地休延所述之
美望慕空深何敢髣髴君愛素情多惠以二贊辭采研
富事義畢舉句韻之間光影相炤便以此地自然十倍
故知麗辭之益其事宏多輒當置之閣上坐卧嗟覽別
卷上篇並為名製又山寺既為警策贈言時復高竒解
頤愈疾兼乎此美遲此叙會更共申析其為約所賞如
此著林廷賦王僧孺見之嘆曰郊居以後無復此作普

通中遷尚書吏部郎署儀曹僕射徐勉以臺閣文議專委焉

劉顯以五官掾兼吏部嘗為上朝詩沈約美之約郊居宅新成因令工書人題於壁

謝徵為臨汝侯淵猷製放生文見賞於世大同二年卒友人瑯琊王籍集其文為二十卷終尚書左丞

臧嚴初為安成王侍郎轉常侍從叔為江夏郡攜嚴之官於塗作屯游賦任昉見而稱之又作七算辭亦富麗

伏挺有才思好屬文為五言詩善效謝康樂體父友樂安任昉相見歎異嘗曰此子目下無雙著通說十卷文集二十卷

丘遲年八歲便能屬文高祖平京邑時引為驃騎主簿勸進梁王及殊禮皆遲文也遷中書侍郎高祖著連珠詔羣臣繼作者數十人遲文最美所著詩賦行於世遲辭采麗逸時有鍾嶸乃著詩評云范雲婉轉清便如流風迴雪邱遲點綴映媚似落花依草其見稱如此

到溉為建安太守任昉以詩贈之求二衫段云鐵錢兩
當一百易代名實為惠當及時無待涼秋日溉答云余
衣本百結閩中徒八蠶假令金如粟詎使廉夫貧

劉昭勤學善屬文外兄江淹早稱賞起家奉朝請

諸葛璩舉秀才不就所著文章二十卷門人劉暉集而
錄之

劉之遴舉茂才為太學博士中丞樂藹即之遴舅憲臺
奏彈皆之遴草馬

朱異為太學博士有文集百餘篇

司馬鑒為晉安王長史卒王命記室庾肩吾集其文為十卷

蕭子顯好學屬文嘗著鴻序賦尚書令沈約見而稱曰可謂得其明道之高致蓋幽通之流也有文集二十卷終仁威將軍吳興太守

蕭子暉為員外散騎侍郎嘗預重雲殿聽制講三惠經退為講賦奏之甚見稱賞

到蓋左民尚書溉之孫早慧歷尚書殿中郎嘗從高祖
幸京口登北顧樓賦詩蓋受詔便就帝覽以示溉曰蓋
定是才子翻恐卿從來文章假手於蓋因賜溉連珠曰
研磨墨以騰文筆飛毫以書信如飛蛾之赴火豈焚身
之可宏必耄年其已及可假之於少蓋

王訓為侍中美容儀善進止文章之美為後進領袖

劉苞字孝常少好學能屬文為太子洗馬掌書記侍講
壽光殿自高祖即位引後進文學之事苞及從兄孝綽

從弟孺同郡到溉溉弟洽從弟沆吳郡陸倕張率並以
文藻見知多預讌坐

庚於陵清警博學有才思為荊州大中正卒有文集十
卷

鍾嶸字仲偉衡陽王元簡出守會稽引嶸為寧朔記室
專掌文翰時居士何胤築室若耶山山發洪水漂拔樹
石室獨存元簡命嶸作瑞室頌以旌表之辭甚典麗嶸
嘗品古今五言詩論其優劣名為詩評

劉峻字孝標安成王季好峻學季遷荊州引為戶曹參軍後以疾去因遊東陽紫巖山築室居焉為山棲志其文甚美高祖招文學之士有高才多被引進遷以不次峻率性而動不能隨衆沉浮高祖頗嫌之故不任用乃著知命論以寄其懷

劉勰字彥和撰文心雕龍五十篇論古今文也勰自重其文欲取定於沈約約取讀大重之謂為深得文理勰為文長於佛理京師寺塔及名師碑誌必請勰制文終

步兵校尉

庾仲容精專篤學為黜縣令卒有文集二十卷行於世
任孝恭為司文侍郎勅遣製建陵寺刹下銘又自撰高
祖集序文並富麗自是專掌公家筆翰

蕭子範為秘書監有文集三十卷二子滂確並少有文
章簡文在東宮時嘗與郡王數詣蕭文士滂確亦預焉
大寶初葬簡皇后使子範與張纘俱制哀策文簡文覽
讀之曰今葬禮雖闕此文猶不減於舊

後梁蔡太寶自宣帝為岳陽王特署記室及即位以為侍中尚書令太寶文辭贍速帝之章表書記叙令詔冊並太寶專掌之所著文集十卷行於世

傅准有文才善辭賦官至度支尚書所著文集二十卷范廸順陽人少機辯善屬文歷中書黃門侍郎尚書右丞散騎常侍有文集十卷

沈君游吳興人博學有辭采位至散騎常侍天保十二年卒有文集十卷

陳沈衆起家梁鎮衛南平王法曹參軍太子舍人武帝
製千字詩衆為之注解與陳郡謝景同時召見于文德
殿帝令衆為竹賦成奏帝善之尋除鎮南湘東王參軍
何修之為尚書左丞卒所著文章禮義百餘篇

虞寄少聰敏及長好學善屬文性冲靜有棲遁之志弱
冠舉秀才對策高第起家梁宣城王國左常侍大同中
嘗驟雨殿前往往有雜色寶珠武帝觀之甚有喜色寄
因上瑞雨頌帝謂寄兄荔曰此頌典裁清拔卿之士龍

也將如何擢用寄聞之歎曰美盛德之形容以申擊壤
之情吾豈買名求仕者乎乃閉門稱疾惟以書籍自娛
杜之偉幼精敏有逸才為太學限內博士皇太子釋奠
於國學時樂府無孔子顏子登歌詞尚書叅議令之偉
製其文令人傳習以為故事劉陟等鈔撰羣書各為題
目所撰富民政教二篇皆之偉序

虞荔美風儀博覽墳籍善屬文釋褐梁西中郎行參軍
尋署法曹外兵參軍兼丹陽詔獄正梁武帝於城西置

士林館荔乃制碑奏上帝命勒之於館仍用荔為士林
學士

沈初明為吳令侯景將宗子仙據吳興使召初明委以
書記之任初明固辭子仙怒命斬之或救獲免于仙愛
其才終逼之令掌書記及子仙為王僧辯所敗僧辯素
聞其名於軍中購得之酬所獲者鐵錢十萬自是羽檄
軍事皆出於初明及簡文遇害四方岳牧皆上表於江
陵勸進僧辯令初明製表甚工當時莫有逮者高祖南

下與僧辯會於白茅灣登壇設盟初明為其文

徐陵八歲能屬文既長博涉史籍縱橫有才辯梁簡文
在東宮掌長春殿義記使陵為序元帝遣使北齊累求
復命終留不遣乃致書於齊僕射楊遵彥遵彥不報齊
送貞陽侯淵明為梁嗣乃遣陵隨還太尉王僧辯初拒
境不納淵明往復致書皆陵辭也入陳為侍中太子少
傅自有陳創業文檄軍書及受禪詔策皆陵所製而九
錫尤美為一代文宗亦不以此矜物未嘗詆訶作者其

於後進文徒接引無倦世祖高宗之世國家有大手筆
皆陵草之其文頗變舊體緝裁巧密多有新意每一文
出手好事者已傳寫成誦遂被之華夷家藏其本後逢
喪亂多散失存者僅三十卷

徐儉陵之子勤學有志操侯景亂陵使魏未反儉時年
二十一攜老幼避於江陵梁元帝聞名召為尚書金部
郎中嘗侍宴賦詩元帝嘆賞曰徐氏之子復有文焉
蔡景歷為度支尚書景歷屬文不尚雕靡而長於叙事

應機敏速為當世所稱

姚察武帝永定初為始興王府記室參軍吏部尚書徐陵領著作復引為史佐致仕等表並請察製馬陵見歎曰吾弗逮也察每有製述多用新奇專志著書白首不倦徐陵名高一代每見察製述尤所推重嘗謂子儉曰姚學士德學無前汝可師之也尚書令江總與察尤篤厚每有製作必先以簡察然後施用總為詹事時嘗製登宮城五百字詩當時副君及徐陵已下諸名賢並同

此作徐公後謂江曰我所和第五十韻當入弟集內及江編次文章無復察所和本江述徐此意謂察曰高才碩學庶光拙文今湏公所和五百字用偶徐僕射也察謙避未付江曰若不得公此製僕詩亦湏棄本復乖徐公所寄豈得見令兩失察不獲已乃寫本付之為通人推挹例皆如此

顏晃少孤貧好學有詞采初為文帝記室參軍高祖永定二年幸大莊嚴寺其夜甘露降晃獻甘露頌詞義諛

典高祖大奇之

陸瑛字溫玉累遷始興王外兵參軍直嘉德殿學士文帝聽覽餘暇頗留心史籍以瑛博學善占誦引置左右嘗使製刀銘瑛援筆即成無所點竄世祖嗟賞久之賜衣一襲

傅繹在湘州王琳聞其名引為記室琳敗隨琳將孫瑒還都時文帝使顏晃賜瑒雜物瑒託繹啓謝辭理優洽文無加點晃還言之文帝尋召為撰史學士除司空府

記室參軍

陰鏗幼聰慧五歲能誦數千言及長博涉史傳尤善五言詩為當時所重為始興王府中錄事參軍文帝嘗宴羣臣賦詩徐陵言之於帝即日召鏗預宴使賦新成安樂宮鏗援筆便就帝甚嘆賞之

褚玠早有令譽先達多以才器許之及長美風儀善占對博學能屬文詞義典實不好麗靡玠所製章奏雜文二百餘篇皆切事理絲是見重於時位終御史中丞

陸琛少警俊文帝為會稽太守琛年十八上善政頌甚
有詞采繇此知名舉秀才赴京衡陽王主簿兼東宮管
記

徐伯陽為侯安都司空參軍宣帝大建初與中記室李
典記室張正見尚書郎賀徹學士阮卓黃門郎蕭詮三
公郎王繇禮處士馬樞記室祖孫登比部賀循長史劉
刪等為文會之友後有蔡凝劉助陳暄孔範亦預焉皆
一時之士也游宴賦詩遂勒成卷軸伯陽為其集序盛

傳於世伯陽為新安王記室時鄱陽王為江州刺史伯陽嘗奉使造馬王率府僚與伯陽登匡廬嶺置宴酒酣命筆賦雜韻二十伯陽與祖孫登共成王賜以奴婢及雜物皇太子幸太學詔新安王於辟雍發論語題仍命伯陽為辟雍頌甚見嗟賞

陸瑜少篤學美詞藻為東宮學士宣帝大建二年太子釋奠於太學宮臣並賦詩命瑜為序文甚瞻麗

謝貞為南平王友加招遠將軍掌記室事府長史河南

周確新除都官尚書請貞為讓表後主覽而奇之嘗因宴席問確曰卿表自製邪確對曰臣表謝貞所作後主因勅舍人施文慶曰謝貞在王處未有祿秩可賜米百石

江惣好學能屬文於五言七言尤善然傷於浮艷故為後主所愛幸多有艷篇有好事者相傳諷玩於今不絕至隋為上開府卒於江都有文集三十卷行於世

陸從典為太子舍人後主賜僕射江惣并其父瓊詩惣

今從典為謝啟俄頃便就文華理暢揔甚異焉

蕭允為鄱陽王長史王出鎮會稽允行經延陵李子廟設蘋藻之薦託為異代之交為詩以叙意詞理清典後主嘗問蔡徵曰卿世與蕭允相知此公志操何如徵曰其清雲玄遠殆不可測至於文章可得而言因誦允詩以對後主嗟賞久之其年拜光祿大夫

沈不害為通直散騎兼尚書左丞不害治經術善屬文雖博綜墳典而家無卷軸每製文操筆立成曾無尋簡

僕射汝南周宏正嘗稱之曰沈生可謂意聖人乎著文集十四卷初不害為衡陽王記室參軍兼嘉德殿學士表改定樂章文帝詔使製三朝樂歌八首合二十八曲行之樂府

張正見幼好學有才累遷通直散騎侍郎有集十四卷其五言詩尤善大行於世

江德操好學善屬文位終新渝令所著文章十五卷庾特篤志好學尤善書記每屬辭好為奇字有集十卷

位終步兵校尉

後魏張袞好學有文才道武為代王選袞為左長史從太子破賀納遂命羣官登勿居山游宴終日從官及諸部大人請聚石為峰以記功德命袞為文

鄧穎為中書侍郎駕幸漠南高車莫弗庫若干率騎數萬餘驅鹿百萬詣行在所詔穎為文銘於漠南以紀功德

袁躍字景騰博學有雋才為員外散騎常侍將立明堂

躍乃上議當時稱其博洽蠕蠕主阿那瓌之破來奔朝
廷矜之送復其國既而每使朝貢辭旨頗不盡禮躍為
朝臣書與瓌陳以禍福言詞甚美後遷太傅清河王懌
文學懌之文表多出於躍

崔玄伯少有雋才因苻堅亂欲避地江南於泰山為張
願所獲本圖不遂乃作詩以自傷而不行於時蓋懼罪
也及父浩誅中書侍郎高允受勅收浩家始見此詩允
知其意允孫綽錄於允集玄伯位至天部大人玄伯自

非朝廷文誥四方書檄初不染翰故世無遺文

封軌為廷尉少卿沉謹好學博通經傳以務德慎言修身之夙姦回讒佞世之巨害乃為務德慎言遠佞防姦四戒文多不載

陸曄擬急就篇為悟蒙章及七誘十醉章表數十篇位至伏波將軍

高允作塞上公詩有混欣戚遺得喪之致為太常卿上代都賦因以諷規亦二京之流也初允太武神麈中與

盧玄等俱被徵拜中書博士再遷中書令獻文初以昔
歲同徵零落將盡感逝懷人作徵士頌蓋止於應命者
其有命而不至則闕焉羣賢之行舉其梗槩

高和仁為殿中侍御史少清簡有文才為五言詩贈太
尉屬盧仲宣仲宣深所嘆重

李籍之性謹正粗涉文史為大中大夫著忠誥一
多不載

胡叟少聰慧好屬文既善為典雅之詞又工為鄙俗之

句初入長安京兆韋祖思召而見之待叟不足叟拂衣
而出至主人家賦韋杜二族一宿而成年十有八矣具
述前載無違舊美叙中世有協時事而未及鄙瀆人皆
竒其才畏其筆世猶傳誦之以為笑狎歸後為武威將
軍家於密雲被徵至謝恩并獻詩一篇文成時召叟及
金城宗舒並使作檄劉駿蠕蠕之文舒劣於叟舒尋歸
家

游雅為秘書監文成詔為太華殿賦

高閭為中書侍郎奉詔造鹿野苑頌北伐碑獻文善之位至光祿大夫好為文章軍國書檄詔令碑頌銘贊百有餘篇集為二卷其文亦高允之流二高為當時所服趙逸好學風成為中書侍郎凡所著述詩賦銘頌五十篇

盧道將秘書監淵子頗有文才為一家後來之冠位至司徒司馬卒所遺文筆數十篇

劉懋字仲華博綜經史位至太尉司馬所著詩誄賦頌

及諸文筆見稱於世

游肇以文雅見稱為詩賦表啓凡七十五篇皆傳於世
位至驃騎將軍

崔纂字叔則博學有文才為散騎侍郎既不為時知乃
著無談子論

李彪為御史中尉所著詩賦誄頌章奏雜筆百餘篇別
有集

李諧博學有文辯當時俊才咸相欽賞所著文集別有

集錄行於世位至秘書監

邢產字士寶好學善屬文少時作孤蓬賦為時所稱舉
秀才除著作佐郎

崔光本名孝伯字長仁遷中書侍郎給事黃門侍郎甚
為孝文所知待嘗曰孝伯之才浩浩如黃河東注固今
日之文宗也太和中依宮商角徵羽本著而為五韻詩
以贈李彪彪為十二次韻以報光光又為三百郡國詩
以答之凡所為詩賦銘贊及表記啓數百篇五十餘卷

甄密字叔雍侍中琛從父弟也太和中為奉朝請密疾世俗貪競乾沒榮寵曾作風賦以見意

甄琛為侍中所著家誨二十篇篤學文一卷又著磔四聲姓族廢興會通緇素三論頗行於世

袁翻少以才學擅美一時自廷尉少卿出為平陽太守頗有不平之論及之任不自得遂作惡歸賦累遷度支尚書所著文筆百餘篇行於世

常景少聰敏長有才思為太常博士宣武季舅護軍將

軍高顯卒其兄右僕射肇私記景及尚書邢巒并州刺史高聰通直郎徐紇各作碑銘並以呈御宣武悉付侍中崔光以景所造為最乃奏曰常景名位乃處諸人之下文出諸人之上遂以景文刻石正光中除景龍驤將軍孝明於國子寺行釋奠之禮並召百官作釋奠詩時以景作為美初平齊之後光祿大夫高聰徙於北京中書高允為之聘妻給其資宅聰後為允立碑每云吾此文報德足矣豫州刺史常綽以未盡其美景尚允才器

先為遺德頌司徒崔光聞而觀之尋味良久乃云高光
祿平日每矜其文自許報允之德今見常生此頌高氏
不得獨擅其美也尋進號冠軍將軍時尚書令季崇等
追討蠕蠕不及詔景出塞經窳山臨瀚海宣勅勒衆而
返景經山水悵然懷古乃擬劉琨扶風歌十二首景性
溫和恭慎每讀書見韋弦之事深薄之危乃圖古昔可
以鑒戒指事為相讚而述之所著數百篇行於世

邢臧字子良博學有藻思為太學博士孝明正光中議

立明堂臧為裴頠一室之議當時稱其理博有文筆凡百餘篇

裴景融雖才不稱學而敏綴無倦文辭泛溢理會處所
所作文章別有集錄又造鄴都晉都賦云孝莊時為諫
議大夫領著作

柳玄達曾著大夫論備陳裴叔業背逆歸順契闊危難
之旨又著喪服約而易尋官至司徒諮議叅軍

楊固為治書侍御史尉王顯奏固劾請米麥免官既無

事役遂闔門自守著演願賦以明幽微通塞之事

張烈為家誠千餘言并自叙志行及所歷之官位至瀛
州刺史

高謙之有學藝所著文章百餘篇別有集錄官至御史
馮元興博通禮傳有文才為中書舍人有文集百餘篇
封肅字元邕早有文思博涉經史修起居注兼廷尉監
為園園賦其詞甚美孝明正光中京兆王西征引為大
行臺郎中委以書記撰古來文章并序作者氏族號曰

文譜未就病卒時賢良惜之其文筆凡百餘篇

邢虬為光祿少卿明經有文思所作碑頌雜筆三十餘篇

梁祚為中書博士作代都賦頗行於世

夏侯道遷為豫州刺史雖學不周洽而歷覽書史閑習尺牘札翰往來甚有意理

裴敬憲學博才清為太學博士五言之作獨擅於時名聲甚重後進咸共宗慕之中山鎮部朝賢送於河梁賦

詩言別皆以敬憲為最其文不能贍逸而有清麗之美
溫子昇博覽百家文章清婉為廣陽王淵賤客在馬坊
教諸奴子書作侯山祠堂碑文給事中常景見而善之
故詣淵謝之景曰頃見溫生淵怪問之景曰溫生是大
才子淵由是稍知之累遷中書舍人散騎常侍領本州大
中正梁武使張臯寫子昇文筆傳於江外梁武稱之曰
曹植陸機復生於北土恨我辭人數窮百六陽夏太守
傅標使吐谷渾見其國主牀頭有書數卷乃是子昇文

也濟陰王暉業嘗云江左文人宋有顏延之謝靈運梁有沈約任昉我子昇足以陵顏轢謝含任吐沈楊導彥作文德論以為古今辭人皆負才遺行澆薄險忌惟邢子才王元景溫子昇彬彬有德素

梁祐為大中大夫從容風雅好為詩詠

李仲尚儀貌甚美少以文學知名二十著前漢功臣序讚及季父司空冲誄時兼侍中高聰尚書邢巒見而歎曰後生可畏非虛言也起家京兆王參軍

祖瑩歷散騎黃門侍郎以文學見重嘗語人云文章須
自出機杼成一家風骨何能共人同生活也蓋譏世人
好竊他文以為己用而瑩之筆札亦無乏天才但不能
均調玉石兼有製裁之體不減於袁常馬

裴伯茂學涉羣書文藻富贍為中軍大將軍伯茂好飲
酒頗涉踈傲久不徙官曾為豁情賦東魏天平初遷鄴
又為遷都賦

邢昕好學蚤有才情為平東將軍光祿大夫時言冒竊

官級為中尉所勅免官乃為述躬賦

北齊邢邵字子才臧之弟也十歲能屬文文章典麗既
贍且速年未二十名動衣冠後為著作佐郎深為領軍
元乂所禮乂新除尚書令尚書李神雋與陳郡袁翻在
席乂令邵作謝表湏臾便以示諸賓神雋曰邢邵此表
足使袁公變色魏孝昌與黃門侍郎李琰之對典朝儀
自孝明之後文雅大盛邵雕蟲之美獨步當時每有一
文初出京師為之紙貴讀誦俄遍遠近

荀士遜好學有思理為文清典為中書侍郎撰典言行於世

祖珽字孝徵神情機悟詞藻道逸嘗為冀州刺史万俟受雒製清德頌其文典麗絲是神武聞之時文宣為州刺史署珽開府倉曹參軍神武送魏蘭陵公主出塞嫁蠕蠕魏收賦出塞及公主遠嫁詩二首珽皆和之大為時人傳詠珽後為秘書丞領舍人事文襄與令史等作晉州啓請粟二千石代功曹趙彥深宣神武教給城局

叅軍事過典戳高景畧疑其不實密以問彥深彥深答
都無此事遂被推簡珽即引伏神武大怒決鞭二百配
甲坊加鉗其穀倍徵未及科會并州定國寺成神武謂
陳元康温子昇曰昔作芷山寺碑文時稱妙絕今定國
寺碑當使誰作辭也元康因薦珽才學并解鮮卑語乃
給筆札就禁所具二日內成其文甚麗神武以其工而
且速特恕不問然猶免官散參相府

祖鴻勳涿郡范陽人神武曾徵至并州作晉祠記好事

者玩其文位至高陽太守

顏之推博覽羣書辭情典麗有文三十卷並行於世曾撰觀我生賦文致清遠入隋為太子學士

鄭元禮字文規少好學愛文藻名望文襄引為館客歷太子舍人崔昂後妻即元禮之妹也魏叔又昂之姊夫嘗持元禮數篇詩示盧思道乃謂思道云看元禮此來詩詠亦當不減魏叔答云未覺元禮賢於魏叔但知姊夫踈於婦弟終台州別駕

楊愔字彥遵風度深敏所著詩賦表奏書論甚多及誅
後散失門生鳩集所得者萬餘言位至驃騎大將軍開
封王

北齊裴諏之字士正少有儒學楊愔闔門葬記諏之頽
作十餘墓誌文皆可觀入周為文帝大行臺倉曹郎中
卒

陸印字雲駒少機悟善屬文所著文章十四卷行於世
齊之郊廟諸歌多印所製位終吏部郎中

王昕字元景少篤學雅好清言有集二十卷位至銀青光祿大夫判祠部尚書

王晞字叔朗好學不倦文宣天保初行太原郡事嘗詣晉祠賦詩曰日落應歸去魚鳥見留連

劉逖字子長留心文藻頗工詩詠所制詩賦及雜文筆二十卷位至散騎常侍

荀仲舉為義寧太守仲舉與趙郡李暕交遊暕死仲舉因至其宅為五言詩十六韻以傷之辭甚悲切世稱其

美

蕭愨工於詩詠曾秋夜賦詩兩句云芙蓉露下落楊柳
月中疎為知音所賞官為田曹參軍

李廣博涉羣書有才思文義之美少與趙郡李審齊名
為邢魏之亞兼侍御史南臺文奏多其辭也曾薦畢義
雲於崔暹廣卒後雲集其文章十卷託魏收為之序其
族人子道亦有文章

樊遜寓居鄴中為臨漳小史縣令裴鑒莅官清苦致白

崔等瑞上清德頌十首鑒大加賞重擢為主簿

冊府元龜卷八百三十九

欽定四庫全書

冊府元龜卷八百四十

宋 王欽若等撰

總錄部

文章第四

後周薛澄字景猷初仕西魏文帝為中書侍郎大統四年宣光清徽殿初成澄為之頌又文帝作二歌澄各為頌

王褒博覽史傳能屬文初仕梁元帝為僕射江陵未陷

前褒作燕歌行妙盡關塞寒苦之狀元帝及諸文士並和之而競為悽切之詞至此方驗焉

唐瑾為司中大夫兼內史所著賦碑誄二十餘萬言

薛稷幼覽墳籍好屬文所著文章二十餘卷行於世位至驃騎大將軍封開府儀同三司

柳虬字仲盤博涉子史雅好屬文為中書侍郎修起居注時人論文體者有古今之異虬又以為時有今古非文有今古乃為文質論虬有文章數十篇行於世

盧柔為開府儀同三司卒於位所作詩頌碑銘檄表啓
行於世者數十篇

宗慄少聰慧博有才藻位至車騎大將軍儀同三司有
集二十卷行於世

劉璠字寶義篤志好學兼善文筆終為黃門侍郎儀同
三司嘗卧疾居家對雪感興乃作雪賦以遂志有集二
十卷行於世

呂思禮好學有文才長於論難所為筆誅表頌並傳於

世位至都官尚書

庾信幼而俊邁聰敏絕倫初在梁事昭明太子為抄撰
學士既有盛才文並綺艷故世號為徐庾體焉當時後
進競相模範每有一文京都莫不傳誦自梁入周位望
通顯嘗有鄉關之思乃作哀江南賦以致其意後為司
宗中大夫明帝雅好文學信特蒙惠禮羣公碑誌多相
託焉惟王褒頗與信埒自餘文人莫有及者

顏之儀博涉羣書好為辭賦嘗獻神州頌辭致雅贍梁

元帝手勅報曰枚乘二葉俱得遊梁應貞兩世並稱文學我求才子鯁慰哀深江陵平之儀隨例遷長安後為集州刺史有文集十卷行於世

柳慶字更興博涉羣書初仕魏孝武為尚書都官郎中時北雍州獻白鹿羣臣欲草表陳賀尚書蘇綽謂慶曰近代以來文章華麗逮於江左彌復輕薄雒陽後進祖述不已相公柄民軌物君職典文房宜製此表以革前弊慶操筆立成辭兼文質綽讀而笑曰枳橘猶自移况

才子也

柳機博涉羣書辭彩雅贍有文集行於世位至御史下大夫

蘇亮字景順少通敏博學好屬文所著文筆數十篇頗行於世位至侍中

薛慎能屬文善草書為藩部大夫有文集頗為世所傳李旭解屬文武帝時為大將軍開府儀同三司旭自太祖世已當樞要兵馬處分專以委之詔冊文筆皆旭所

作也旭嘗曰文章之事不足流於後世經邦治務庶及
古人故所作文筆了無藁草

韋曼高尚不仕時武帝以佛道儒三教不同詔曼辨其
優劣曼以三教雖殊同歸於善其道似有深淺其致理
若無等級著三教序奏之帝覽而稱善曼少愛文史留
情著述手自抄錄數十萬言晚節虛靜惟以體道會真
為務舊所製述咸削其藁故文筆雖多並不存

檀翥字鳳翔好讀書善屬文為殿中侍御史臺中表奏

皆翦為之

隋虞世基初仕陳為尚書左丞陳主嘗於幕府山較獵令世基作講武賦於座奏之陳主嘉之賜馬一疋陳滅歸國為通直郎內史省嘗為五言詩以見意情理淒切世以為工作者莫不吟咏

盧愷魏中書監柔之子也為禮部大夫李穆攻拔軹關拍崖山鎮命愷作露布帝讀之大悅曰盧愷文章大進荀景倩故是令君之子

許善心幼聰明有思理解屬文高祖時為虞部侍郎開
皇十六年有神雀降於含章閣高祖召百官賜讌告以
此瑞善心於座請紙筆製神雀頌頌成奏之高帝甚悅
曰我見神雀共皇后觀之今旦召公入適述此事善心
於座始知即能成頌文不加點筆不停毫嘗聞此言今
見其事因賜物二百段

孫萬壽博涉子史善屬文滕穆王瓚引為文學坐衣冠
不整配防江南行軍總管宇文述召典軍書萬壽鬱鬱

不得志為五言詩贈京邑知友盛為當時之所吟誦天下好事者書壁而翫之

王貞少聰敏善屬文詞開皇中舉秀才授縣尉非其道也於是謝病於家齊王暕鎮江都以書召之又索文集貞啓謝上集云十三卷復上江都賦

李德林善屬文辭覈而理暢魏收嘗對高隆之謂其父曰賢子文筆終當繼溫子昇隆之大笑曰魏常侍殊已嫉賢何不近比老彭乃遠求溫子後北齊任城王諧薦德

林於尚書令楊遵彥楊遵彥即令德林製讓尚書令表
援筆立成文不加點因大相賞異以示吏部郎中陸卬
云已見其文筆浩浩如黃河東注比來所見後生制作
涓澮之流耳卬仍命其子又與德林周旋戒曰汝無事
宜師此人以為模楷齊平為高祖丞相府從事內中郎
禪代之際其相國摠百揆九錫殊禮詔策牋表璽書皆
德林之辭也高祖登位為內令史卒既有才名重以
貴顯凡製文章動行於世或有不知者謂古人焉初撰

奉思賦一篇世稱其麗又德林以梁士彥及元諧之徒頗有逆意大江之南抗衡上國乃著天命論上之所撰文集勒成八十卷遭亂亡失見二十卷行於世

潘徽性聰敏善屬文為秦孝王俊學士從俊朝京師在塗令徽於馬上為賦行一驛而成名曰述恩賦俊覽而善之又為述江都集禮序

杜正玄自八世祖曼至正玄世以文學相授僕射楊素負才傲物正玄抗辭酬對無所屈撓素不悅久之會林

邑獻白鸚鵡素促召正玄使者相望及至即令作賦正
玄倉卒之際援筆成章素見文不加點始異之因令更
擬諸雜文筆十有餘條又皆立成而詞理華贍素乃嘆
曰此真秀才吾不及也

祖君彥言詞訥澁有才學大業末為李密所得署為記
室參軍軍書羽檄皆成於其手

楊素為尚書令嘗以五言詩七百字贈番州刺史薛道
衡氣調宏拔風韻秀上亦為一時之盛作未幾而卒道

衡嘆曰人之將死其言也善豈若是乎有集十卷

牛宏在周起家為納言上士嘗專文翰甚有稱善以大業六年卒加右光祿大夫贈儀同三司有文集十二卷行於世

何妥為龍州刺史箴勒於州門外有文集十卷並行於世

王頰字景文解綴文善談論有文集十卷官至國子博士

薛孺清貞孤介不交流俗涉歷經史有才思雖不為大夫所有詩詠詞致清遠為襄城郡掾卒官

諸葛穎能屬文煬帝時為著作郎甚見親倖有集二十

卷

常得志博學善屬文官至秦王記室及王薨過故宮為五言詩詞理悲壯甚為時人所重復為兄弟論義理可稱

王胄字承基為著作佐郎以文詞為煬帝所重帝自東

都遷京師賜天下大酺因為五言詩詔胄和之帝覽而善之因謂侍臣曰氣高致遠歸之於胄詞清體潤其在世基意密理新推庾自直過此者未可以言詩也帝所有篇什令繼和

庾自直少好學大業初為著作佐郎自直解屬文於五言詩尤善性恭慎不妄交遊時為煬帝所愛帝有篇章必先示自直令其詆訶自直所難帝輒改之或至於再三俟其稱善然後方出其見親禮如此

薛道衡為尚書左外兵郎陳使傅繹聘齊以道衡兼主
客郎接對之繹贈詩五十韻道衡和之南北稱美魏叔
曰傅繹所謂以蚓投魚耳道衡位至司隸大夫有集七
十卷

薛師古為安城尉時薛道衡為襄州總管與其祖有舊
又悅其才有所綴文帝嘗使其倚撫利病甚親昵之

宇文弼音弼博學多通為禮部尚書所著詞賦二十餘萬

言

虞綽字士裕博學有俊才尤工草隸陳左衛將軍傅繹有盛名於世見綽詞賦歎謂人曰虞郎之文無以尚也為著作佐郎從煬帝征遼東帝舍臨海顧見大鳥異之詔綽為銘帝覽而善之命有司勒於海上

柳詵少聰敏解屬文為晉王諮議參軍王朝京作歸藩賦命詵為序詞甚典初王屬文效庾信體及見詵後文體遂變詵位至秘書監有集十卷

高構字孝基有名於時河東薛道衡才高當世每稱構

有清鑒所為文筆必先以草呈構有所詆訶道衡未嘗
不嗟伏位至吏部侍郎

杜正臧字為善好學善屬文弱冠舉秀才授純州行參
軍歷下邑正臧著碑誄銘頌詩賦百餘篇又著文章體
式大為後進所寶時人號為文軌乃至海外高麗百濟
亦共傳習稱為杜家新書

唐高士廉風調溫雅屬詞清潤隋司隸大夫薛道衡起
居舍人崔祖濬並稱先達與士廉為忘年之好每因事

陳多賦篇章繇是公卿藉甚位至尚書右僕射同中書門下平章事

褚亮初在陳年十八詣僕射徐陵與商確文章陵每嘆異後主聞之召見時江摠及諸詞人咸在詔亮賦詩合坐推善國初為宏文館學士亮本以文翰知名每有新詩好事之人傳寫信宿遍於京邑

虞世南善屬文嘗祖述徐陵陵亦言世南得已之意世南為秘書少監上聖德詞論多不載康國獻獅子詔世

南為之賦命編之東觀

袁朗勤學好屬文初在陳為秘書郎嘗製千字詩當時以為盛作後主聞而召入禁中使為月賦朗染翰立成後主曰此賦謝希逸不能獨美於前矣又使為芝草嘉蓮二頌深見優賞歸朝為給事中卒有文集十卷

庾抱初在隋為延州參軍後三歲調吏部尚書牛宏知其有學術給筆札令自序援翰便成宏甚奇之後補元德太子學士會皇孫載誕太子宴賓客召於坐獻嫡皇

孫頌深被嗟賞

謝偃為魏王府功曹偃嘗為塵影二賦其詞甚工太宗聞而召見自製賦序言區寓又安功德茂盛令其為賦偃奉詔撰成名曰述聖賦賜綵數十疋偃又獻推皇誠德賦以申諷諫時李百藥工為五言詩而偃善作賦時人稱為李詩謝賦焉

張蘊博涉書傳善綴文自幽州總管府記室直中書省太宗初即位上大寶箴以諷

李百藥七歲能屬文隋大業中授桂州司馬所經名川
美境必制篇章莫不藻麗清新為當時所諷誦貞觀十
一年以宗正卿致仕太宗嘗製帝京篇命百藥並作歎
其工手詔曰卿何其身之老而才之壯齒之宿而意之
新乎百藥藻思沉鬱尤長於五言詩雖樵童牧豎亦皆
唵諷有集三十卷

蕭瑀字時文梁明帝之子也姊為隋晉王妃從入長安
聚學屬文帝觀劉孝標辨命論惡其傷先王之教述性

命之理乃作非辨命論以釋之大旨以為人稟天地氣
生孰云非命然吉凶禍福亦因人而有若一之於命其
敝已甚時晉府學士柳顧言諸葛穎稱之曰自孝標後
數十年間言性命之理者莫能詆詰今蕭君此論足療
劉子膏盲瑤太宗時位至太子太保同中書門下

岑文本為秘書郎直秘書省太宗行藉田之禮文本上
藉田頌及元日臨軒宴百僚文本復上三元頌其辭甚
美

劉子翼以文學知名貞觀中為著作郎宏文館學士有
集二十卷

杜正倫善屬文貞觀初置文學館尚書左丞魏徵表薦
正倫以為古今難匹遂擢授兵部員外累遷中書令有
集十卷行於代

張昌齡弱冠以文辭知名貞觀二十一年翠微宮成詣
闕獻頌太宗召見試作息兵詔草俄頃而就太宗甚悅
乃勅於通事舍人裏供奉後卒於襄州司戶有文集三

十卷行於代

元萬頃善屬文起家拜通事舍人從李勣征高麗為遼東道管記時別帥馮本以水軍拔裨將郭待封船破失期待封欲作書與勣恐高麗知其救兵不至乘危迫之乃令萬頃作離合詩贈勣

李義府瀛州饒陽人也初應進士舉劉洎馬周薦之太宗令詠烏義府援筆為詩曰上林無限樹不借一枝棲太宗喜曰當借卿全樹何一枝也尋除監察御史

張文宗為亳州刺史高宗永徽初表獻太宗文皇帝頌
優制褒美賜絹百匹

富嘉謨舉進士為晉陽尉與新安吳少微友善同官先
是文士撰碑頌皆以徐庾為宗氣調漸劣嘉謨與少微
屬辭皆經典為本時所欽慕之文體一變稱為吳富體
嘉謨作雙龍泉頌千蠋谷頌少微撰崇福寺鐘銘詞最
高雅作者推重嘉謨既卒少微哭而賦詩尋亦卒

李安期百藥之子也七歲解屬文龍朔中為司列少常

伯受詔為東封朝覲壇碑文

崔行功為司文郎中當時朝廷大手筆多是行功及蘭臺侍郎李懷儼之詞有集六十卷

裴遵慶初登省所嘗著王政記述今古理體識者見之知有公輔之量位至尚書左僕射

上官儀涉獵經史善屬文龍朔中為宏文館學士工於五言詩好以綺錯婉媚為本當時多有效其體者時人謂上官體

崔液湜之子也尤工五言之作湜嘗嗟賞之曰海子我家之神駒也海子即液小名官至殿中侍御史坐凡配流逃匿於郢州胡履靈之家作幽征賦以見意詞甚典麗遇赦還道病卒友人裴耀卿纂其遺文為集十卷

王勃字子安六歲善屬文未弱冠應幽素舉及第乾封初詣闕上宸遊東岳頌時東都初造乾元殿勃又上乾元殿頌沛王賢聞其名召為沛府修撰甚愛重之諸王鬪鷄互有勝負勃戲為檄英王鷄文勃後以罪除名往

交趾省父道出江中為採蓮賦以見意其辭甚美勃每有制作時人咸諷詠之著有文集三十卷

楊炯華州華陰人博學善屬文為盈川令如意元年十月望日宮中出盂蘭盆分送佛寺則天御雒城南門與百寮觀之炯獻盂蘭盆賦詞甚雅麗少與絳州王勃范陽盧炤鄰東野駱賓王皆以文詞知名海內稱為王楊盧駱亦號為四傑炯聞之謂人曰吾愧在盧前恥居王後當時議亦以為然崔融李嶠及張說皆為一時宗匠

崔李嘗曰王勃文章宏逸有絕塵之跡固非常流所及
炯與炤隣則可企而至盈川之文如懸河注水酌之不
竭既優於盧亦不減王恥居王後則然愧在盧前為誤
矣

盧炤隣博學善屬文為新都尉以疾居陽翟之具茨山
著釋疾文五悲等詞頗有騷人之風甚為文士所重有
文集二十卷

駱賓王善屬文於五言詩尤妙為長安主簿坐職左遷

郝雲卿集其文為十卷

麴昭祖為司膳卿頗以詩詠流譽有文集二十卷

劉知幾為懷州獲嘉縣主簿則天朝官爵易得而法網嘗嚴故人競為趨進而多陷刑戮知幾又著思慎賦以刺時且以見志鳳閣侍郎蘇味道李嶠見之相顧而歎曰陸機豪士所不及也當今防身要道盡在此矣

員半千為右衛長史顯福門待制則天封中岳半千撰封禪四壇碑十二首

張鷟字文成自長安尉遷鴻臚丞凡四參選判策為銓
府之最員外郎員半千謂人曰張子之文如青銅錢萬
選萬中未聞退時時流重之目為青錢學士後為司門
員外郎鷟下筆敏速著述尤多言頗詼諧是時天下知
名無賢不肖皆記誦其文天后朝中使馬仙童陷默啜
默啜謂仙童曰張文成在否曰近自御史貶官默啜曰
國有此人而不用漢無能為也新羅日本東夷諸蕃尤
重其文每遣使入朝必重出金貝以購其文其才名遠

播如此

孔紹安少以文辭知名為秘書監因侍宴應詔詠石榴
詩曰只為時來晚花開不及春時人稱之

蘇味道初為裴行儉征突厥管記孝敬皇帝妃父裴居
道再登左金吾將軍訪當時才子為謝表託於味道援
筆而成詞理清密盛傳於世

朱敬則為左補闕嘗採魏晉已來君臣成敗之事著十
代興亡論十卷為當代所重有集十卷行於世

崔融為國子司業兼修國史為文典麗當時罕有其比
文集六十卷傳於代

杜審言雅善五言詩為雒陽丞坐事貶授吉州司戶參
軍又與州寮不協司馬周季重與員外司戶郭若訥共
構審言罪狀繫獄將因事殺之既而季重等於府中酣
讌審言子并年十三歲懷刃以擊之季重中傷而死并
亦為左右所殺季重臨死曰吾不知杜審言有孝子郭
若訥誤我至此審言因此免官還東都自為文祭并後

則天召見審言將加擢用問曰卿歡喜否審言蹈舞謝
恩因令作歡喜詩甚見嘉賞終修文館直學士有文集
二十卷

劉允濟為左史兼直宏文館垂拱四年明堂初成允濟
上明堂賦天后甚嘉歎之手製褒美拜著作郎

宋之問弱冠知名尤善於五言詩當時無出其右為尚
方監丞左奉宸內供奉則天幸維南龍門令從官賦詩
左史東方虬詩先成則天以錦袍賜之及之問詩成則

天稱其詞愈高奪虬袍以賞

閻朝隱文章雖無風雅之體而善構甚奇為時人所賞
累遷給事中

陳子昂苦節讀書尤善屬文初為感遇詩三十首京兆
司功王適見而驚曰此子必為天下文宗後為武攸宜
管記文翰皆委之有文集十卷友人黃門侍郎盧藏用
為之序

韋承慶為鳳閣侍郎同鳳閣鸞臺平章事兼修國史中

宗神龍初坐附推張易之弟昌宗失實配流嶺表時易之等既伏誅承慶去巾解帶而待罪時欲草赦書衆議以為無如承慶者乃召承慶為之承慶神色不撓援筆而成詞甚典美當時咸歎服之承慶嘗以人用心多擾濁浮躁罕詣冲和之境遂著靈臺賦以廣其志

盧藏用尚書承慶之族有才藝草知名睿宗朝為尚書左丞有集二十卷

沈佺期善屬文尤長五言之作與宋之間齊名時人稱

為沈宗位至太子詹事有集十卷弟佺交及子亦以文
詞知名

李適為工部侍郎時天台道士司馬承禎被徵至京師
及還適贈詩叙其高尚之致其詞甚美當時朝廷之士
無不屬和凡百餘人徐彥伯編而叙之謂之白雲記

許景先為中書舍人以文翰見稱中書令張說嘗稱曰
許舍人之文雖無峻鋒激流斬絕之勢然屬詞豐且美得
中和之氣亦一時之秀

李華為吏部員外郎頗善屬文與蘭陵蕭穎士友善華
進士時著含元殿賦萬餘言穎士見而賞之曰景福之
上靈光之下華文體溫麗少宏傑之氣穎士詞鋒俊發
華自以所業過之疑其詆訶乃為上古戰場文燻汙之
如故物置於佛書之閣華與穎士因閱佛書得之華謂
之曰此文何如穎士曰可矣華曰當代秉筆者誰及於
此穎士曰君稍精思便可及此華愕然華著論言龜卜
可廢通人賞其言又為魯山令元德秀墓碑顏真卿書

李陽冰篆額後人爭摸寫之號為四絕碑

蕭穎士登進士第有盛名李林甫採其名欲拔用之乃
召見時穎士寓廣陵居母喪即縗麻而詣京師徑謁林
甫於政事省林甫素不識遽見縗麻大惡之即令去穎
士大怒乃為伐櫻桃賦以刺之

王仲舒嗜學工文為職方郎中知制誥仲舒文思溫雅
制誥所出人皆傳寫

徐安貞尤善五言詩為中書舍人集賢院學士玄宗屬

文作手詔多命安貞視草甚承恩顧累遷中書侍郎

王翰為并州長史張嘉貞奇其才禮接甚厚翰感之撰樂府詞以叙情有文集十卷

李邕早擅才名尤長碑頌雖貶職在外中朝衣冠及天下寺觀多齋金帛往求其文前後所製數百篇受納饋遺亦至鉅萬時議以為自古鬻文獲財未有如邕者邕歷汲郡二太守姦賊事發誅有文集七十卷其張韓公行狀洪州放生池碑批韋巨源謚議文士推重之

王維有俊才尤工五言詩獨步於當時染翰之後人皆
諷誦位至尚書右丞

杜甫天寶末獻三大禮賦玄宗竒之召試文章授京兆
府兵曹參軍甫與李白齊名而白自負文格放達譏甫
齷齪有文集六十卷

熊廷景為岐王文學有五色鸚鵡能言育於宮中玄宗
令左右試牽御衣鳥輒嗔目叱咤廷景因獻鸚鵡篇以
贊其事帝以鳥及廷景詩示百寮尚書左丞相張說上

表賀曰伏見天恩以靈異鸚鵡及熊廷景所述篇出示朝列臣按海南異物志有時樂鳥鳴皆曰太平天下有道則見臣驗其圖丹首紅臆朱冠綠翼與此鸚鵡無異而心聰性辯護主報恩故非常品凡禽寶瑞經所謂時樂鳥也廷景雖叙其事未正其名望編國史以彰聖瑞許之

王昌齡為文緒微而思清為汜水縣尉貶斥而卒有文集五卷

賈至為中書舍人祿山之亂從上皇幸蜀時肅宗即位於靈武上皇遣至為傳位冊文上皇覽之歎曰昔先帝遜位於朕冊文即卿父所為今朕以神器大寶付儲君卿又當演誥累朝盛典出卿父子之手可謂繼美矣

冊府元龜卷八百四十

欽定四庫全書

冊府元龜卷八百四十一 宋 王欽若等撰

總錄部

文章第五

唐李揆少聰敏好學善屬文開元末舉進士補陳留尉
獻書闕下詔中書試文章擢拜右拾遺改右補闕起居
郎並知宗正表奏

高適好學以詩知名濩落不事家產僑居梁宋間薄遊

州縣求丐取給天寶中海內無事干進者注意文詞適賦詩以氣質自高時得佳句每詩朝出夕遍人口李林甫奏授汴州封丘尉

元德秀為魯山令秩滿居陸渾山琴觴之餘間以文詠牽情而書語無雕刻著季子聰樂論蹇士賦為高人所稱

李泌字長源聰敏好學博涉經史善屬文尤長於詩肅宗時為銀青光祿大夫掌樞務

于休烈好學善屬文位至工部尚書有集十卷行於世
李端登進士第工詩代宗大厯中與韓翃錢起盧綸等
文詠唱和馳名都下號大厯十才子時郭尚父少子暖
尚代宗女昇平公主賢明有才思尤喜詩而端等多在
暖之門下每宴集詩賦公主坐視簾中詩之美者賞百
縑因拜官會十子曰詩先成者賞時端先獻警句云
薰香荀令偏憐小傅粉何郎不解愁主即以百縑賞之
錢起曰李校書誠竒才此篇宿構也願賦韻正之請以

起姓為韻端即襞牋而獻曰方塘似鏡草芊芊初月如
鈎未上弦新開金埒教調馬舊賜銅山許鑄錢暖曰此
愈工也端自校書郎授杭州司馬卒

吳通元為中書舍人翰林學士詞藻婉麗帝尤憐之貞
元初李紓為昭德皇后謚冊文張延賞柳渾為廟樂章
及進皆不稱旨並詔通元重撰凡中旨撰述非通元之
筆無不慊然重之如此

劉太真涉學善為文少時師事詞人蕭穎士位至吏部

侍郎

李紆字仲舒少好學善屬文為吏部侍郎奉詔為興元紀功述及郊廟樂章諸所論著甚衆

李益宰相揆之族子登進士第長於歌詩德宗貞元末與宗人李賀齊名每作一篇必為教坊樂人以賂求取唱為供奉歌詞其征人歌早行篇好事者畫為屏障如迴樂峰前沙似雪受降城外月如霜之句天下以為歌詞位至禮部尚書

盧景亮為中書舍人上西戎利害疏皆指切正要當時服其才有文集十卷

張宏靖為東都留守從事獻賦美二京之制德宗嘉其文擢授監察御史

崔元翰性介直少交遊惟秉一操專業於文章其對策及奏記碑誌師法班固蔡邕致思精密貞元中為職方員外郎知制誥

于邵以博通宏詞昇甲科位至中書侍郎有文集四十

卷行於時

武元衡工於五言詩好事者傳之往往被於管絃元衡位至宰相

竇叔向羣之父也以工詩稱官至拾遺

柳渾志學有文集十卷位至宰輔渾之兄識篤意文章有重名於開元天寶間與蕭穎士元德秀劉迅相亞其練理創端往往詣極當時作者咸服其簡拔而趣尚辯博渾亦善為文然趨時向功非沉思之所及

韓愈幼孤刻苦學儒不俟獎勵大歷貞元之間文士多尚古學效揚雄董仲舒之述作而獨孤及梁肅最稱淵奧儒林推重愈從其徒遊銳意鑽仰欲自振於一代嘗以為自魏晉已還為文者多拘偶對而經誥之指歸遷雄之氣格不復振起矣故愈所為文務反近體抒意立言自成一家新語後學之士取為師法當時作者甚衆無以過之故世稱韓文焉然時有才肆意亦有鑿孔孟之旨若南人妄以柳宗元為羅池神而愈謨碑以實之

李賀父名晉不應進士而愈為賀作諱辯令舉進士又為毛穎傳譏戲不近人情此文章之甚謬者愈官至吏部侍郎

薛盛河東人存誠之父也工為拔河賦當時稱之

崔咸長於歌詩或風景晴明花朝月夕朗吟意愜必悽愴霑襟旨趣高竒名流嗟悒有文集一十卷

權德輿述作特盛六經百氏游泳漸漬其文雅正而宏博王侯將相洎當時名士薨歿以銘紀而請者十八九

文士推為宗匠焉終禮部尚書有文集五十卷行于代
袁滋字德深嘗讀劉惔悲甘陵賦歎其褒善懲惡雖失
春秋之旨然其文不可廢因著甘陵賦後序滋位終湖
南觀察使

郝高卿少以詞學見推有文集六十卷位至太子詹事
致仕

孟簡幼為五言詩有名於江淮終太子賓客

元稹聰警絕人年少有才名與太原白居易友善工詩

善狀詠風態物色當時言詩者稱元白爲白衣冠士子
至閭閻下俚悉傳諷之號爲元和體既以俊爽不容於
朝流放荆蠻者僅十年俄而白居易亦貶江州司馬稹
量移通州司馬雖通江懸邈而二人來往贈答凡所爲
詩句有三五十韻乃至百韻者江南人士傳道諷誦
流聞闕下里巷相傳爲之紙貴觀其流離放逐之意靡
不悽惋十四年自虢州長史徵還爲膳部員外郎宰相
令狐楚一代文宗雅知稹之詞學謂稹曰嘗覽足下製

作所憾不多遲之久矣請出其所有以豁予懷稹因獻其文自叙曰稹初不好文徒以仕無他岐彊繇科試及有罪譴棄之後自以為廢滯潦倒不復為文字有聞於人矣曾不知好事者抉摘芻蕪塵瀆尊重竊丞相公特於廊廟間道稹詩句昨又面奉教約令獻舊文戰汗悚踊慙忝無地稹自御史府謫官於今十餘年矣間誕無事遂專力於詩章日益月滋有詩句千餘首其間感物寓意可備矇瞽之諷者有之詞直氣麗罪卹是懼固不

敢陳露於人惟盃酒光景間屢為小碎篇章以自吟暢
然以為律骨卑庠格力不揚苟無姿態則陷流俗嘗欲
得思深語近韻律調新屬對無差而風情宛然而病未
能也江湖間多新進小生不知天下文有宗主妄相倣
效而又從而失之遂至於支離褊淺之詞皆目為元和
詩體稔與同門生白居易友善居易雅能為詩就中愛
驅駕文字窮極聲韻或為千言或為五百言律詩以相
投寄小生自審不能過之往往戲排舊韻別創新詞名

為次韻相酬蓋欲以難相排耳江湖間為詩者復相倣
效力或不足則至於顛倒語言重複首尾韻同意等不
異前篇亦目為元和詩體而司文者考變雅之由往往
歸咎於稗嘗以為雕蟲小事不足以自明始聞相公記
憶累旬以來實慮糞土之牆庇之以大厦便不復破壞
永為版築者之娛輒寫古體歌詩一百首百韻至兩韻
律詩一百首合為五卷奉啟跪陳或希構厦之餘一賜
觀覽知小生於章句中樂虛椽桷之材盡曾量度則十

餘年之遭迴不為無用矣楚深稱賞以為今代之鮑謝也穆宗皇帝在東宮有妃嬪左右嘗誦稹歌詩以為樂曲者知稹所為嘗稱其善宮中呼為元才子荆南監軍崔潭峻甚禮接種不以掾吏遇之嘗徵其詩什諷誦之長慶初潭峻居朝出稹連昌宮辭等百餘篇奏御穆宗大喜問稹安在對曰今為南宮散郎即日轉祠部郎中知制誥朝廷以書命不繇相府甚鄙之然詞誥所出負然與古為侔遂盛傳於世繇是極承恩顧稹嘗為長慶

宮詞數十百篇京師競相傳唱所著詩賦詔冊銘誄論議等雜文一百卷號曰元氏長慶集又著古今刑政書三百卷號類集並行於世

李紳六歲而孤母盧氏教以經義紳形眇小而精悍能為歌詩鄉賦之年諷誦多在人口位至宰相

馮定字介夫累遷太子詹事定有文學長慶中源寂使新羅國見其國人傳寫諷念定所為黑水碑畫鶴記章休符之使西蕃也見其國人寫定商山記以代屏障其

文名馳於戎夷如此

李德裕於東都伊闕南置平泉別墅清流翠篠樹石幽
竒初未仕時講學其中及從官藩服出將入相三十年
不復重遊而題寄歌詩皆銘之於石今有花木記歌篇
錄二石存焉有文集二十卷記述舊事則有次柳氏舊
聞御臣要略伐叛志獻替錄行於世

李商隱能為古文不喜偶對嘗為令狐楚從事慕楚章
奏始為今體章奏博學彊記下筆不能自休尤善為誄

莫之詞累為賓佐有表狀集四十卷

溫庭筠苦心硯席尤長於詩賦初舉進士至京師人士
翕然推重然士行塵雜不修邊幅能逐絃吹之音為側
艷之詞公卿家無賴子弟相與酬飲繇是累年不第後
為襄陽巡官失意歸江東庭筠著述頗多而詩賦韻格
清拔文士稱之

司空圖僖宗時為中書舍人未幾以疾辭晚年為文尤
事曠達嘗擬白居易醉吟傳為休休亭記有文集三十

卷

唐彥謙歷閬壁二郡刺史有詩數百篇吏部侍郎薛廷珪為之序號鹿門先生集

梁杜荀鶴池州人善為詩詞句切理為時所許既擢第後還舊山時田頔在宣州甚重之頔將起兵乃陰令以牋辭至太祖遇之頗厚及頔遇禍太祖以其才表之尋授翰林學士主客員外郎

羅隱有詩名於天下尤長於詠史然多譏諷以故不中

第開平初太祖以右諫議大夫徵不至魏博節度使羅紹威密表慰薦乃授給事中終於錢塘有文集十卷行於世

後唐李愚初仕梁為右拾遺崇政殿學士忤旨罷職歷許鄧觀察判官初在內職磁州舉子張礪依馬末帝貞明中礪自河陽北歸莊宗版授太原府掾出入崇達之門揄揚愚之節槩及愚所為文仲尼遇顏回壽夷齊非餓等篇北人望風稱之愚為文尚氣格效韓柳諸公之

立意

李琪字台秀唐昭宗時李谿父子以文學知名於時琪年十八九袖賦一軸謁谿谿覽賦驚異倒屣迎門因出琪啞鐘捧日等賦指示謂琪曰予嘗患近年文士詞賦皆數句之後未見賦題吾子八句見題偶屬典麗吁可畏也琪繇是益知名自琪為諫官憲職凡時政有所不便必封章論列文章秀麗覽之者忘倦琪在內署時所為制誥編為十卷目曰金門集大行於世

竇夢徵少苦心為文隨計之秋文稱甚高位終翰林學士尤長於牋啟編為十卷目曰東堂集行於世

薛廷珪為中書舍人所著鳳閣書詞十卷克家志五卷並行於世初廷珪父逢著鑿混沌真珠簾等賦大為時人所稱廷珪既壯亦著賦數十篇同為一集故目曰克家志

晉李象為刑部員外郎高祖天福末象上二舞賦帝覽而嘉之命編諸史冊

崔稅少好學博涉經史屬詞頗工流輩罕能及之閒居於滑二十餘年專以著述為事不遊里巷郡人罕識其面梁貞明中舉進士後為翰林學士

苻蒙幼聰慧好學父習為常山偏校嘗遣與文士共處年十二遊佛寺見壁畫有孟渡道人因題其腹曰都緣心似水故以鉢為舟人稍推之繇是篤意吟詠經亭榭祠廟之間皆削拂音拂染翰題詩而去人愛其速成往往傳誦弱年漁獵子史不辨經書為文浮靡惡微婉之言

好為宮體艷詩及嘲謔之語位終禮部侍郎

周張沆記覽文史好徵求僻事公家應用時出一聯以炫竒筆位終刑部尚書

王延少學為儒著詞賦欲從科舉會鄉里亂客浮陽屬滄帥戴思遠棄鎮歸梁延挈族從之以家人貧遊丐侯門嘗以所為賦謁侍郎李琪琪覽而欣然曰此道近難其人王生升我堂矣繇是人士稱之延後為太子少傅

致仕

馬裔孫字慶先初仕後唐為宰相以晉祖受命放歸後以賓客致仕又為太子詹事晉漢公卿以裔孫好為文章皆欣然待之太祖即位就加檢校禮部尚書

馮道初仕後唐為相百寮上明宗徽號凡三章道自為之其文混然非流俗之體舉朝服焉道尤長於篇詠秉筆則成每成義含古道必為遠近傳寫故人漸畏其高深繇是班行肅然無澆漓之態

王仁裕有詩千餘首勒成一百卷目之曰西江集蓋以

嘗夢吞西江文石遂以為名馬位至太子少保

賈緯有文集三十卷目之為草堂集終青州行軍司馬
扈載少好學善屬文賦頌碑贊尤其所長廣順初隨計
於禮部文價為一時之最是歲昇高等位至翰林學士

冊府元龜卷八百四十一